



# ВЫЛЬ СІЗЕН



ОТДЕЛ  
РЕЛИГИОЗНОГО  
ОБРАЗОВАНИЯ

## ИОАНН АПОСТОЛЛЭН ЫСТЭМ КУИНЕТІ ГОЖТЭТЭЗ

<sup>1</sup>Вөсяськисьёслэн валтйсьсы – гажано Гаийлы, кудзэ мон зэмзэ ик яратйсько.

<sup>2</sup>Гажаное! Вөсяськисько кынаро мед улод, вань ужьёсад азинлыкез мед луоз шуыса, кызьы тынад лулыдлэн азинэз вань. <sup>3</sup>Мон уго туж шумпотй куке агай-выньёс лыктыса тынад оскиськымон луэмед сярись шара ивортйзы, – тон зэмлык бордын улйськод. <sup>4</sup>Мынам нылпиосы зэмлык бордын уло шуыса кылйсько ке, – мон понна солэсь бадзымез шумпотон өвөл.

<sup>5</sup>Гажано эше! Агай-выньёслы, пыдйылчиослы юрттйськыса тон шонер лэсьтйськод. <sup>6</sup>Тынад яратонэд сярись соос черкын шара ивортйзы. Тон умой лэсьтод, озьы соосты сюрес вылэ келяд ке, кызьы кулэ Инмар понна. <sup>7</sup>Солэн нимыз понна соос сюрес вылэ потйзы уго, язычникъёслэсь номыр басьтытэк. <sup>8</sup>Озьы, зэмлыко ужлы юрттйськись луон понна, асьмеос сыче муртъёсты санэ поныны кулэ.

<sup>9</sup>Мон черксылы гожъяй вал, нош соослэн азьпальяськыны яратйсь Диотрефсы милемыз санэ уг поны. <sup>10</sup>Соин ик, мон лыктй ке, солэсь лэсьтэм ужьёссэ шарае потто – со милемыз урод кыльёсын сапта, но со уг тырмы, ачиз но агай-выньёсты дораз уг куты, мылкыд карисьёслы но уг лэзьы, соосты черкысь улля. <sup>11</sup>Гажано эше! Уродлэсь адзем эн кар, зечлэсь адзем кар. Кин зеч уж лэсьтэ,



со Инмар бордысь, нош урод уж лэсьтйсь – Инмарез өз адзы. <sup>12</sup>Димитрий сярысь ваньмыз умоен верало, ачиз зэмлык но со сярысь ивортэ; ми но шара ивортйськомы, тй тодйськоды, милям ивортонмы зэм шуыса.

<sup>13</sup>Трос мынам гожьянэ, но мынам уг поты тыныд чернилаен, бодыен гожьяме. <sup>14</sup>Оскиськисько, тонэ жоген адзо но ваче пуксьыса верасько шуыса. <sup>15</sup>Каньыллык тыныд. Эшьёсыд салам верало. Ваньзэс эшьёсмес нимысьтыз зечкыла. Аминь.

